

學術叢編

第九卷至第十二卷

上海書店出版社

學術叢編

第九卷至第十二卷

上海書店出版社

學術叢編

卷九

學厚 世弱
編纂

廣倉學
刊行

學術叢編

第九期



漢魏博士考卷中

稿本

王國維撰

小學叢殘

稿本

汪黎慶撰

祕書監志

劉彥清手鈔拜經樓舊藏景元寫本

元王士點撰
商企翁

隨志

天一閣舊藏明藍格鈔本



漢魏博士考卷中

海寧王國維

兩漢博士

一易博士

田王孫

漢書儒林傳丁寬授同郡碭田王孫王孫授施讎孟喜梁邱賀
讎爲童子從田王孫受易後讎徙長陵田王孫爲博士復從卒
業

案王孫師丁寬景帝時人弟子施讎孟喜梁邱賀皆宣帝時
人則王孫爲博士當在武帝之世蓋建元中置五經博士始

爲易博士者卽王孫也儒林傳贊言自武帝立五經博士初書惟有歐陽禮后易楊春秋公羊然傳言楊何元光中徵爲大中大夫不云拜博士蓋易楊乃易田之誤易家先師田何楊何田王孫或同姓或同名故往往相亂史記儒林傳云要言易者本於楊何漢書則作要言易者本之田何此云易楊亦當爲易田之譌田王孫與楊何同爲田何再傳弟子然楊出王同田出丁寬又楊何之傳爲司馬談京房梁邱賀王孫之傳爲施讎孟喜梁邱賀然各自名家不得混而爲一也

甲易施氏博士

施讎

漢書儒林傳施讎字長卿沛人也沛與碭相近讎爲童子從田王孫受易後讎徙長陵田王孫爲博士復從卒業與孟喜梁邱賀並爲門人謙讓常稱學廢不肯教授及梁邱賀爲少府事多乃遣子臨分將門人張禹等從讎問讎自匿不肯見賀固請不得已乃授臨等於是賀薦讎束髮事師數十年賀不能及詔拜讎爲博士甘露中與五經諸儒雜論同異於石渠閣

漢書藝文志易章句施氏二篇

案漢書百官公卿表宣帝神爵三年光祿大夫梁邱賀爲少府讎爲博士在賀爲少府之後施氏博士之立亦在此時矣

張禹

漢書本傳張禹字子文河內軹人也壯至長安學從沛郡施讎
受易琅邪王陽膠東庸生問論語既明習有徒衆舉爲郡文學
甘露中諸儒薦禹有詔太子太傅蕭望之問禹對易及論語大
義望之善焉奏禹經學明習有師法可試事奏寢罷歸故官久
之試爲博士

中略

河平四年代王商爲丞相封安昌侯

漢書藝文志論語魯安昌侯說二十一篇孝經安昌侯說一篇
彭宣

漢書本傳宣字子佩淮陽陽夏人也治易事張禹舉爲博士

中

略元壽元年遷御史大夫轉爲大司空封長平侯

乙易孟氏博士

白光

翟牧

漢書儒林傳孟喜授同郡

東海

白光少子沛翟牧子兄皆爲博士

朱雲

漢書本傳雲字游魯人也徙平陵年四十從博士白子友受易

又事前將軍蕭望之受論語皆傳其業

中略

元帝時少府五鹿

充宗貴幸爲梁邱易自宣帝時善梁邱氏說元帝好之欲考其

異同令充宗與諸易家論充宗乘貴口辨諸儒莫能與抗皆稱

疾不敢會有薦雲者召入攝齋升堂抗首而請音動左右既論

難連柱五鹿君故諸儒爲之語曰五鹿嶽嶽朱雲折其角由是

爲博士遷杜陵令

案博士白子友齊氏召南謂卽儒林傳之白光少子考朱雲
旣折五鹿充宗又廷辱張禹充宗傳梁邱易禹傳施氏易如
齊氏說則雲事白光爲孟喜弟子充宗與禹雖皆以姦佞爲
雲所嫉亦當以與雲同經異師臭味不同其說殆是也白子
友爲博士殆與蕭望之爲前將軍同時或稍在其前而望之
爲前將軍在宣帝黃龍元年則子友爲博士亦在宣帝時蓋
孟氏初置博士卽以子友爲之也

嚴望

嚴元

漢書朱雲傳雲教授擇諸生然後爲弟子九江嚴望及望兄子元字仲能傳雲學皆爲博士望至泰山太守

注丹

後漢書儒林傳注丹字子玉南陽育陽人也世傳孟氏易王莽時常避世教授專志不仕建武初爲博士稍遷十一年爲大鴻臚作易通論世號注君通

丙易梁邱氏博士

士孫張

漢書儒林傳梁邱賀傳子臨臨代

劉奉世曰代當爲授

五鹿充宗君孟充

宗授平陵士孫張仲方張爲博士至揚州牧光祿大夫給事中

家世傳業

梁恭

范升

後漢書范升傳升字辨卿代郡人習梁邱易建武二年拜議郎遷博士上疏讓曰臣與博士梁恭山陽太守呂羌俱修梁邱易二臣年並耆艾經學深明而臣不以時退與恭並立深知羌學又不能達願推博士以避恭羌帝不許

張興

後漢書儒林傳興字君上潁川鄢陵人習梁邱易建武中舉孝廉卽謝病去稍遷博士永平初遷侍中祭酒十年拜太子少傅

丁易京氏博士

殷嘉

姚平

乘弘

漢書儒林傳京房授東海殷嘉河東姚平河南乘弘皆爲郎博士

漢書藝文志易京氏段嘉十二篇蘇氏曰東海人爲博士

案殷嘉段嘉傳志不同自係一人傳言嘉平弘三人皆爲郎博士不知三人皆由郎爲博士與抑或爲郎或爲博士與未能詳也京房傳言上令房上弟子曉知考工課吏事者欲試

用之房上中郎任良姚平欲以爲刺史是姚平曾爲郎之證
又易京氏立博士在元帝世未幾而廢疑京氏之立在房用
事之時其廢卽在房獲罪之後其間不過數年未必有三人
爲博士然儒林傳語未分析無由質言之矣

二書博士

張生

史記儒林傳伏生教濟南張生及歐陽生張生爲博士

鼂錯

漢書本傳錯潁川人也以文學爲太常掌故孝文時天下亡治
尙書者獨聞齊有伏生故秦博士治尙書年九十餘老不可徵